

Berpegang teguh pada nilai yang mengikat erat kita – PM Najib
Astro Awani
Dis 24, 2016

KUALA LUMPUR: Perdana Menteri Datuk Seri Najib Tun Razak berkata rakyat Malaysia perlu berpegang teguh pada nilai-nilai murni yang mengikat erat mereka selama ini seperti sikap bertoleransi antara satu sama lain dan membantu golongan yang memerlukan.

Dalam perutusan Krismasnya, beliau berkata nilai-nilai itu didukung oleh penganut semua agama.

Dalam kenyataan menjelang sambutan perayaan itu esok, katanya: "Ini merupakan masa untuk menyerlahkan nilai-nilai yang menjadi pegangan penganut Kristian dan agama-agama yang lain - saling menghormati, sikap bertoleransi antara satu sama lain dan membantu mereka yang kurang bernasib baik.

"Ini merupakan nilai-nilai yang mengikat erat kita semua, untuk meraikan kekayaan dan kepelbagaian yang wujud di negara ini, bersama-sama," kata Najib.

Perdana menteri turut mengucapkan 'Selamat Menyambut Krismas' kepada rakyat Malaysia yang menyambut perayaan itu di tanah air atau di luar negara bersama-sama orang tersayang.

Katanya ia merupakan hari yang mengumpulkan dan menyatukan rakan dan anggota keluarga di seluruh negara.

-- BERNAMA

Tag: [Datuk Seri Najib Tun Razak](#), [Krismas](#), [agama](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/berpegang-teguh-pada-nilai-yang-mengikat-erat-kita-pm-najib-126812>